



Broj: 01,02,03,03/11-05-1-1276/18
Sarajevo, 6. 7. 2018.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 18-07-2018

Organizaciona jedinica	Klasifikaciona oznaka	Redni broj	Broj priloge

B

**IZVJEŠTAJ S TREĆEG DIJELA REDOVNOG ZASJEDANJA PARLAMENTARNE
SKUPŠTINE VIJEĆA EVROPE, STRAZBUR,
25 - 29. 6. 2018.**

U Strazburu je od 25. do 29. 6. 2018. održan treći dio plenarnog zasjedanja Parlamentarne skupštine Vijeća Evrope, kao i sjednice komiteta i političkih grupa PS Vijeća Evrope kojima su prisustvovali članovi Delegacije Parlamentarne skupštine BiH u Parlamentarnoj skupštini Vijeća Evrope u kojoj su bili:

1. Borjana Krišto, zamjenica predsjedavajućeg Delegacije,
2. Mladen Bosić, član Delegacije,
3. Milica Marković, članica Delegacije,
4. Damir Arnaut, član Delegacije,
5. Saša Magazinović, zamjenik člana Delegacije,
6. Sevda Valjevčič, sekretar Delegacije, i
7. Adnan Bešić, prevodilac.

25. 6. 2018.

Treći dio zasjedanja PS Vijeća Evrope počeo je izborom nove predsjednice Lilliane Maury Pasquier iz Parlamenta Švicarske, nakon što je ostavku na tu funkciju podnio italijanski poslanik Michele Nicoletti, s obzirom na to da u martu ove godine nije izabran na parlamentarnim izborima u Italiji. U svom uvodnom obraćanju predsjednica Pasquier naglasila je važnost daljnjeg zalaganja za provođenje osnovnih vrijednosti Vijeća Evrope.

Potpredsjednica Vlade i ministrica vanjskih i evropskih poslova Hrvatske Marija Pejčinović-Burić, u svojstvu predsjedavajuće Komiteta ministara Vijeća Evrope predstavila je Skupštini program i aktivnosti šestomjesečnog hrvatskog predsjedavanja, te se osvrnula na izazove i buduće djelovanje Vijeća Evrope, kao i na zaštitu prava nacionalnih manjina, kao jednog od prioriteta predsjedavanja, nakon čega je odgovarala na pitanja zastupnika.

26. 6. 2018.

Drugog dana zasjedanja na sjednici Komiteta za pravna pitanja i ljudska prava PS Vijeća Evrope, Uvodni memorandum o temi: "Garantiranje izvršavanja preporuka Evropskog komiteta za sprečavanje mučenja i nečovječnog ili ponižavajućeg postupanja (CPT)" prezentirao je član naše delegacije i izvjestilac PS Vijeća Evrope o ovom pitanju Damir Arnaut.

Arnaud je zagovarao jačanje uloge parlamenta u osiguravanju izvršavanja preporuka CPT-a. U svom izlaganju izrazio je razočarenje zbog činjenice da Ministarstvo vanjskih poslova BiH i Predsjedništvo BiH još uvijek nisu proveli proceduru predlaganja kandidata Bosne i Hercegovine za mjesto u CPT-u koje pripada našoj zemlji, a koje je upražnjeno još od decembra prošle godine.

Članovi Komiteta jednoglasno su usvojili Arnautove prijedloge za održavanje saslušanja eksperata na narednoj sjednici Komiteta, kao i za upućivanje upitnika parlamentima država članica Vijeća Evrope o mjerama koje su već preduzeli s ciljem jačanja provođenja preporuka CPT-a. Arnaut je tek treći izvjestilac PS Vijeća Evrope iz Bosne i Hercegovine za više od 16 godina članstva naše zemlje u Vijeću Evrope.

Drugog dana zasjedanja na brojna pitanja poslanika odgovarao je generalni sekretar Vijeća Evrope Torbjorn Jagland.

Prisutnima se isti dan obratio hrvatski premijer Andrej Plenković, koji je istaknuo važnost provođenja zajedničkih standarda Vijeća Evrope u svim državama članicama, te je predstavio prioritete hrvatskog predsjedavanja u borbi protiv korupcije, zaštiti prava nacionalnih manjina i ranjivih grupa, decentralizaciji i jačanju lokalne uprave i samouprave te zaštiti kulturne baštine i kulturnih ruta.

Drugog dana zasjedanja Parlamentarna skupština je za sudiju Evropskog suda za ljudska prava izabrala kandidata San Marina Gilberta Felićija.

27. 6. 2018.

Trećeg dana zasjedanja predstavljen je izvještaj o vanteritorijalnoj obradi zahtjeva za azil i uspostavljanje sigurnosnih prihvatnih centara za izbjeglice u inozemstvu, o kojem se raspravljalo u zajedničkoj raspravi sa izvještajem o uticaju „vanjske dimenzije“ politike azila i migracija EU na ljudska prava te izvještajem o međunarodnim obavezama zaštite života na moru država članica Vijeća Evrope. Nakon rasprave, u kojoj je učestvovao i grčki ministar za useljeničku politiku Dimitrios Vitsas, koji je naglasio kako države članice trebaju jednako podijeliti svoju odgovornost i solidarnost u vezi s migracijskom i izbjegličkom krizom. Nakon održane zajedničke rasprave, Skupština je usvojila rezolucije.

Istog dana održana je rasprava vezi s položajem nevladinih organizacija u pojedinim državama članicama Vijeća Evrope, kao i rasprava o progonima LGBTI osoba u Čečeniji.

Plenumu se obratio premijer Slovačke Petar Pellegrini.

28. 6. 2018.

Četvrtog dana zasjedanja članica naše delegacije Milica Marković izabrana je za predsjedavajuću političke grupe „Slobodni demokrati“. „Slobodni demokrati“ jedna su od ukupno šest političkih grupa poslanika koje djeluju u PS Vijeća Evrope.

Izborom na poziciju predsjedavajuće političke grupe „Slobodni demokrati“ Milica Marković postala je i članica Biroa PS Vijeća Evrope. koji čine predsjednik, 20 potpredsjednika, predsjedavajući Komiteta i predsjedavajući političkih grupa PS Vijeća Evrope.

Prisutnima se obratio i ministar vanjskih i evropskih poslova Luksemburga Jean Asselborn.

Tokom ljetnog dijela zasjedanja održana je i hitna rasprava o prijetnjama zdravlju i životu ukrajinskih zatvorenika u Ruskoj Federaciji i okupiranom Krimu, te rasprave o humanitarnoj situaciji izbjeglica smještenih u zemljama u susjedstvu Sirije, zaštiti branilaca ljudskih prava, prisilnim brakovima u Evropi, ravnoteži između održavanja porodica i najboljeg interesa djeteta.

Treći dio zasjedanja okončan je raspravom o namjernom uništavanju i ilegalnoj trgovini kulturnom baštinom, kako i raspravom o mjerama za osnaživanje žena u privredi.

Članovi Delegacije PSBiH u PS Vijeća Evrope koji su boravili u Strazburu aktivno su učestvovali u ativnostima radnih tijela PS Vijeća Evrope (komiteta i političkih grupa) čiji su članovi, a koje su se održavale tokom junskog dijela zasjedanja PS Vijeća Evrope.

Pripremila¹: Sevda Valjević


Sekretar Delegacije

Dostavljeno:

- kolegijima oba doma PSBiH
- Komisiji za vanjske poslove PDPSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- članovima Delegacije PSBiH u PS Vijeća Evrope
- Kolegiju Sekretarijata
- Sektoru za međunarodne odnose i protokol
- Sektoru za odnose s javnošću
- a/a

¹ Uz saglasnost rukovodioca Sektora